

## **Wakita na a puwatertaa Paul ge emnde a AIFAISUS**

### *Ga use á Paul*

<sup>1</sup> Náwa wakita na yá aṅkwa puwetá bá iya Paul, a eksisaa ba Dadaamiya geni yá gevge slebela á Yaisu \*Almasiihu, yá aṅkwa gakur use ge kure emnde á Dadaamiya am Aifaisus, ge kure emnde na ṅakurnaṅa elva á Yaisu Almasiihu an ervaunḡe á kure palle na.

<sup>2</sup> Tara Eddemiya Dadaamiya tá antara Yaisu Almasiihu, a magarakuránmaga ṅgurna, a varakurteva hairire.

*Barka na á gaterá Dadaamiya ge emnde na garevge*

### *palle antara Yaisu \*Almasiihu*

<sup>3</sup> Galaumigála Dadaamiya Eddenara ge Yaakadada Yaisu \*Almasiihu, adaba a gamiyar barka am duksa bademme á sá am samaya, adaba gamiyevge palle antara Yaisu Almasiihu.

<sup>4</sup> Dadaamiya ndza a dzeramise werre, kwaye zlaḡe ba duniya keni zlaḡe nderaaka emtsaade, geni mí de geva emnde cuḡeḡe, mí de gev palle antara Yaisu Almasiihu, watse baaka duksa mandzawe áte miya á katafke-aara.

<sup>5</sup> Adaba wayamiwayire, Dadaamiya a dzeramise werre geni á de gamive egdzara-aara á kya erva an Yaisu Almasiihu. A maganaa á ba áte namaari-aara.

<sup>6</sup> Daaci galaumigala Dadaamiya adaba kwakyire á ngurna na a magaminaa nane ba dey á kya erva an Egdza-aara na a wayanaa nane na.

<sup>7</sup> Adaba emtsa á Egdza-aara, Dadaamiya a naba lyamisehe, a yamiyaare haypa-aha á miya. Á maraminá an una nanna kwakyire á ngurna-aara na á magamiyán ge miya.

<sup>8</sup> Dadaamiya a magamiyaa ngurna kwakya ge miya á bá iya na wá, adaba a vamite ilmu, a gamive emnde a enkale geni mí diyeddiye názena á kátá maganá nane na.

<sup>9</sup> A maramise nasherire á duksa na ankwa á slaslaná nane kwaye kinekineka, a njante geni á de maganá á kya erva an Yaisu Almasiihu na.

<sup>10</sup> Duksa na á kátá maganá nane na wá, amaana á de jemá duksa bademme, una am samaya, antara una áte haha bademme, á de yaná am erva á Yaisu Almasiihu. Daaci á de geva nane slekse arge duksa-aha nanna bademme má samsa laukte-aara.

<sup>11</sup> Dadaamiya ankwa á maga duksa bademme áte una ndza a slaslanaa nane, a njante ganakini á de emmága na. Daaci a naba dzeramise kwaye kinekineka geni watse á de gamive emnde-aara á kya erva an Yaisu \*Almasiihu, á de vamite dza á miya keni am duksa shagera na watse á de vaterte ge emnde-aara na.

<sup>12</sup> Daaci ntere Yahudiya-aha na na emnde zunḡwe ge fetaare áte Yaisu Almasiihu na wá, galaumigála Dadaamiya adaba una nanna bademme na.

<sup>13</sup> Ba estuwa ge kure keni. Am sarte na

cenakuráncena elva a jirire, elva a Yaisu Almasiihu na Dadaamiya a lyakurse an ñane na, kwa naba fetarehe áte Yaisu Almasiihu. Daaci adaba gakurevge palle antara Yaisu Almasiihu, Dadaamiya a naba fete damshe-aara áte kure, amaana Shedekwe Cudedede na a ba Dadaamiya á de vamiteva na.

<sup>14</sup> Dadaamiya a vamite Shedekwe Cudedede ñanna wá, ba seke namána. Una ñanna ba seydire geni duksa shagera na a ba ñane á de vaterteva ge emnde-aara na keni watse mí shansha bademme. Watse mí shá una ñanna má lyamiselye náza ba ge dekideki na. Daaci galaumigála Dadaamiya am yaikkire-aara.

*Paul á ñalateru ilmu antara diya ge emnde a fetarfe*

<sup>15</sup> Adaba una-aha ñanna egdzar mama-aha-aaruwa, yá ankwá slafaná we-aaruwa kwakya ge Dadaamiya adaba kure. Adaba cenanáncena labare á kure ganakini shagera fetarfire á kure áte Yaakadada á miya Yaisu \*Almasiihu, cenanáncena zlafe adaliye ganakini wayakurwáyá an emnde á Dadaamiya kwakya.

<sup>16</sup> Ma vaatara keni yá ankwá slafaná ba we-aaruwa ge Dadaamiya adaba kure, yá ankwá yehakuryeha jipu am maduwa-aha-aaruwa.

<sup>17</sup> Yá ankwá ñala Dadaamiya Saksage, Dadaamiya á Yaakadada Yaisu Almasiihu na, geni á gakurvege emnde a ilmu, á marakuránmára ire-aara an pute na kwá de diyeddiye ñane ba shagera na.

<sup>18</sup> Zlaɓe ádaliye yá anƙwa ɗalán ganakini á werakurta ice áte duksa-aha na a dáhakur ge ɗane na, antara geni kwa diyeddiye ganakini duksa-aha ɗanna jauje ge duksa baɗemme, a fakúr ge kure, antara emnde-aara umele baɗemme.

<sup>19</sup> Zlaɓe ádaliye: Yá kátá kwá diyeddiye hákuma yaikke na jauje ge duksa baɗemme anƙwa á maga slera ám miya emnde-aara na. Hákuma ɗanna wá, ba una ndza a magaa slera yaikke am Yaisu Almasiihu,

<sup>20</sup> am sarte na a tsantaa Dadaamiya am fáyá, a danaa á dem naɗafa-aara am samaya na.

<sup>21</sup> Am samaya ɗanna wá, Yaisu Almasiihu de gevge slekse á malika-aha, antara male-aha-aatare, antara duksa-aha na tá án hákuma am samaya baɗemme. Ba ɗane palle una átire ge emnde baɗemme, una ma edda-aara a shaa eksle-ara keni. Ba ɗane palle una á kwará emnde am duniya na, antara am duniya na watse á de sáwá na keni baɗemme.

<sup>22</sup> Dadaamiya a fanem duksa baɗemme am erva ge ɗane. Zlaɓe ádaliye: a ganve slekse arge aiklasiya-aara.

<sup>23</sup> Aiklasiya wá, ɗane vuwa á Yaisu Almasiihu. Baɗemme á duksa na am Yaisu Almasiihu, anƙwa am aiklasiya. Yaisu Almasiihu wá, ma am tate-ara keni, ɗane anƙwa baɗemme.

## 2

*Tseta am emtsa geva an shifa*

<sup>1</sup> Werre wá, ndza kwa ba seke emtsa á katafke á Dadaamiya adaba shagerkire an haypa-aha na kwa maganaa kure.

<sup>2</sup> Ma am zlalava á kure keni, ndza kwa ba palle antara emnde umele am duniya. Ndza kwa d'aba ba male á jini-aha na an hakuma am zhegela na. Á maganá ba nane slera-aara am emnde na tá fansareka ge Dadaamiya dekideki na.

<sup>3</sup> Werre wá, ba miya keni ndza mi ba seke emnde nanna, ndza mi maga ba názena á kataná ire á miya ge vuwa á miya. Adaba una nanna, miya keni ma andze mí de shá zlada kwakya áza Dadaamiya ba seke emnde a haypa umele.

<sup>4</sup> Amá gafka estuwa, adaba Dadaamiya wayamiwaya kwakya, daaci a naba zamivarehe.

<sup>5</sup> Ma ndza mi ba seke emtsa am ice-aara adaba haypa keni, adaba wayava-aara áte miya na wá, a naba shifamite átirpalle antara Yaisu \*Almasiihu. Daaci kina wá, lyakurlya shifa á kure adaba ngurna á Dadaamiya.

<sup>6</sup> Adaba gamiyevge palle antara Yaisu Almasiihu na wá, Dadaamiya a naba tsamite átirpalle antara nane, kwaye a damiyaa á dem samaya, geni mí de njá am yaikkire áhuwa antara Yaisu Almasiihu.

<sup>7</sup> Dadaamiya a naba magamiyaa shagerire estuwa á kya erva an Yaisu Almasiihu na wá, geni ma vaatara keni á maratarná an una nanna ge emnde bademme ngurna yaikke na jauje ge duksa bademme na.

<sup>8</sup> Ba jirire Dadaamiya a lyakurse adaba slera á kure-ka, nane a lyakurse adaba ngurna-aara. Una duksa dey na a vakurtaa nane adaba kwa

fetare áte ñane.

<sup>9</sup> Adaba slera á kure-ka, una ðekidèki, una ba ñgurna-aara, geni ma ware edda-aara keni a galeka ire ba dey.

<sup>10</sup> Dadaamiya wá, a nderamihe, a vamite shifa áñwaslire á kya erva an Yaisu Almasiihu geni mí maga ba duksa na shagera na. Shagerire ñanna keni, a tsatsaminaa ba ñane kwaye am fakta.

*Am erva á Yaisu \*Almasiihu gamiyevge ba jeba palle*

<sup>11</sup> Adaba una ñanna, yehauteyeha ba shagera geni kwaye am fantaufe, am jeba á kure bademme ndza kwa ba emnde na baaka nadina á kure. Yahudiya-aha itare ta emnde na tá am shedekwe, ndza tá zharakur ba seke duksa ba dey adaba kwa baaka am shedekwe. Amá una ba duksa na tá maganá ba emnde áte vuwa-aatare.

<sup>12</sup> Yehauteyeha zlaɓe ádaliye ganakini am sarte ñanna, kure ndza diyakurka elva a \*Almasiihu ðekidèki, ndza kwa baaka am kezlakula á \*Iserayiila-aha. Dadaamiya a ñgudateraa namána-aha ge emnde-aara Iserayiila-aha, amá kure ndza kwa baaka am hufe-aara, ndza baaka tama á kure áte duksa á Dadaamiya ðekidèki, kure keni kwa ba emnde tsa am duniya na, aley ndza diyakurka Dadaamiya.

<sup>13</sup> Werre, ndza kwa yiyiye an Dadaamiya. Amá kina wá, kwa herzhe an Dadaamiya áfaba gakurevge palle antara Yaisu Almasiihu na ñane a naba yaa shifa-aara áte dzañgala adaba kure na.

14 Shamiyansha hairire am dagave á miya antara kure kina keni, adaba ba gamiyevge emnde-aara. Werre wá, ndza anƙwa tegava am dagave á Yahudiya-aha antara emnde na baaka nadina-aatare, amá ɲane a naba se magaa pute geni mí gevge ba palle. A janaahe ge ɲane dugune na ndza ba seke riya am dagave á miya na an emtsa-aara áte dzangala.

15 Shairiya á Yahudiya-aha na a ba ɲane: Sey ká maga una bi maŋka una na, a bezanaahe ge ɲane, geni á jaterme Yahudiya-aha antara emnde a jeba umele na baaka nadina-aatare na átirpalle. Ba seke una garevge palle am elva-aara na wá, daaci baaka gergerire-aatare mazla-aara, garevge ba palle, jeba aɲwaslire. A feme estuwa hairire am dagave á miya.

16 An emtsa-aara áte dzangala ɲanna wá, Yaisu \*Almasiihu a naba janaahe dugune na ndza am dagave á jeba-aha gergere ɲanna, a magaa pute geni tá gevge ba jeba palle. Zlaɓe ádaliye: a slapateraahe baɗemme-aatare áza Dadaamiya.

17 Sawa-aara á sem duniya na wá, a se bala ba elva a hairire, geni kure emnde na baaka nadina á kure, ndza diyakurka Dadaamiya na, antara ɲere Yahudiya-aha na diyaɲerdiya Dadaamiya na, baɗemmire á miya mí shansha hairire ɲanna.

18 Adaba ɲane, ɲere antara kure baɗemme á miya shamiyánsa baráma á deza Ed-demiya Dadaamiya an hákuma á Shedekwe Cudedɗe. Ba Shedekwe Cudedɗe palle una slemelamiyumele baɗemmire á miya.

19 Máki ba estuwa wá, kwa wayve-aha-ka mazla-aara, bi kwa emnde na ndza kwa sáwá an sawa, amá gakurevge ba emnde a larde miyenne, kwa emnde á Dadaamiya ba miyenne, kwa ba palle antara emnde umele na tá am huđe á há-aara na.

20 Nabi-aha antara emnde a bela Yaisu \*Almasiihu ta fantau ge slera ɲanna ba seke má tá faná ekte ge bere. Daaci kure wá, kwa ba seke nakwa-aha am dagave á nakwa-aha á nyaɲa bere ɲanna. Yaisu Almasiihu an ire-aara wá, ɲane nakwa na á ɲá ndzedá á bere ɲanna baɗemme.

21 Áɗaba barka-aara, baɗemme á bere á njá ba degdege, ámberá aɲkwa á wálá, geni á gevge bere cudedɗe na watse á njá Dadaamiya am huđe-aara na.

22 Ba seke una ni kure gakurevge palle antara Yaisu Almasiihu na wá, kure keni gakurevge dalbe palle am bere ɲanna. Kure antara emnde umele, baɗemmire á kure wá, gakurevge ba seke bere ɲanna á nja Sheɗekwe á Dadaamiya am huđe-aara na.

### 3

#### *Slera na a faara Dadaamiya ge Paul*

1 Adaba ba una ɲanna, yá aɲkwa maga maduwa arge kure. Iya Paul yá am dangay kina, áɗaba ba slera á Yaisu \*Almasiihu ɲanna, ya maganaa am dagave á kure kwa emnde na baaka nadina á kure.

2 Diyandiya ba jirire ganakini cenakurancena slera na a fyaare Dadaamiya am dagave á kure,



ba ɲane ɲanna zlaɓe ádaliye una a magiyaa ɲgurna geni yá maganaamaga slera ɲanna.

<sup>3</sup> Dadaamiya a naba marise názena am ire-aara, ba kinamina na keni ya zluwa á puwakurte ba ɲane cekwaanɗuɗi.

<sup>4</sup> Má kwá aɲkwa ndaha egdza elva-aaruwa ɲanna ya puwakurtaa ya ba kina na wá, watse kwá naba diyeddiye átekwa ganakini diyandiya ya názena an shebe am elva a Yaisu \*Almasiihu na baɗemme.

<sup>5</sup> Am zamane-aha na dedde na wá, Dadaamiya ndza marateranka nasherire ɲanna ge emndimagwaha. Amá am salikataliya na wá, a naba magaa pute geni Sheɗekwe-aara Cudedɗe á maratersemare duksa ɲanna ba parakke ge nabi-aha-aara antara ge emnde a bela-aara.

<sup>6</sup> Nawa ɲane nasherire ɲanna: Dadaamiya a fateraa duksa shagera ge Yahudiya-aha geni á de geva átuge itare. Amá kina wá, kure emnde na ndza kwa baaka am nadina na keni, kwá ba am huɗe-aara, aɲkwa dza á kure. Kure, antara Yahudiya-aha gakurevge ba emnde a jeba palle mázla-aara. Daaci duksa na á ba Dadaamiya á de vaterteva ge Yahudiya-aha na wá, ge kure keni á de vakurteva. Baɗemme á duksa ɲanna wá, ba nampire á elva á Yaisu Almasiihu. Kwaya ɲane nasherire ɲanna.

<sup>7</sup> Ganevge sleslera á Dadaamiya kina ge balatera labáre á higa, elva a Yaisu \*Almasiihu ge emnde keni, una ndzedá-aaruwa-ka, ba hakuma á Dadaamiya. Ba ɲane una a magiyaa ɲgurna á una ɲanna.

<sup>8</sup> Yá á kataliya ba iya am emnde á Dadaamiya bademme, aley Dadaamiya a naba magiyaa ngurna ba ge iya nanna keni, a give slebalatera rezegire na á zleka defekideki na ge emnde na baaka nadina-aatare. Rezegire nanna wá, a sanaa Yaisu Almasiihu, jauje ge diya á emnde bademme.

<sup>9</sup> Zlabe adaliye maa, a magiyaa ngurna á palaterná názu a slaslanaa nane am ire-aara na ge emnde bademme. Ba nane Dadaamiya na a nderanaa nane duksa bademme una ndza a shebanve duksa nanna kwaye am fakta á duksa bademme.

<sup>10</sup> Amá kina wá, Dadaamiya maresemáre duksa nanna am aiklasiya-aara, geni tá nanna malika-aha na tá am samaya, antara male-aha-aatare bademme, lauktu tá de diyeddiye geni ilmu á Dadaamiya wá, ankwá gergere ba kwakya baaka zlakta-aara.

<sup>11</sup> Daaci Dadaamiya a maganaa á ba áte una ndza a njantaa nane kwaye am fakta geni watse á de emmága na. Bademme á una nanna a maganaa á ba á kya erva an Yaakadada Yaisu Almasiihu.

<sup>12</sup> Ba adaba famitarefe áte Yaisu Almasiihu, gamiyevge palle antara nane na wá, daaci shamiyánsha barama á deza Dadaamiya an baakire á lyawa.

<sup>13</sup> Adaba una nanna, gazlauka defekideki adaba zladá na yá ankwá shaná ya adaba kure na, táslawa á kure. Baira una nanna ankwá á melakurumele ge kure.

*Háyáva na á wayámiyá Yaisu \*Almasiihu an*

*ηane*

<sup>14</sup> Adaba una ηanna, yá anƙwa kezlan ugie ge Eddemiya Dadaamiya, yá maga maduwa arge kure.

<sup>15</sup> Baɗemme á emnde-aara na tá am samaya na, antara emnde na tá am duniya, tá á ba an dada-aha-aatare. Baɗemme tá njá á ba áte ndzedá á Eddemiya Dadaamiya palle.

<sup>16</sup> Yá anƙwa ηala áza Dadaamiya geni á ndzedakurtendzedá ba ηane an hákuma á Sheɗekwe-aara, geni kwá gevge emnde a ndzendzedá áte uηηule-aara. Á magakurá una ηanna áte yaikkire-aara ge ηane.

<sup>17</sup> Yá anƙwa ηala ázenara geni a njiinja Yaisu \*Almasiihu am kure, adaba fetarfire á kure áte ηane. Zlabe adaliye yá yekakuru wayavire, geni kwá wayaavewáye á ba an jirire am dagave á kure. Má kwá anƙwa wayaavewáya am dagave á kure wá, kwá de gevge emnde ndzendzedá áte uηηule-aara. Estuwa kwá tsaatse degdege ba seke náfa na má dámda slalwe-aara ba shagera á dem haha na.

<sup>18</sup> Daaci antara emnde a fetarfe umele átirpalle wá, kwá dzegwándzegwa eccena-aara ba shagera, geni Yaisu Almasiihu wá, anƙwa á wayamiwáyá á ba an jirire. Una ma kwá dálá á detire, ma kwá tsekwá á dem áhá, ma kwá deme keni, kwá de bera wáyáva á Yaisu Almasiihu wá, á ba anƙwa ba estuwa.

<sup>19</sup> Yá anƙwa ηala Dadaamiya zlabe adaliye: geni kwá diyeddiye wáyáva á Yaisu Almasiihu na jauje ge diya á emnde baɗemme na. Má shakuransha una ηanna wá, názena an ηane

Dadaamiya wá, am kure keni ba una ñanna.

<sup>20</sup> Dadaamiya wá, baaka názu á janviyaaja ge ñane. Baira ñane á januje am duksa na mí ndavanuwá miya, antara una mí slaslaná miya na. Baðemme á una ñanna á maganá á ba an hákuma-aara na aṅkwa á maga slera am miya na. Galaumigálá ba ñane palle.

<sup>21</sup> Ma vaatara keni dem ba ge ðekideki, yaikkire ba názá-aara palle am aiklasiya-aara, adaba Yaisu Almasiihu. \*Aamin.

## 4

### *Geva vuwa palle*

<sup>1</sup> Daaci, yá aṅkwa ñalákurá ba iya Paul, ya dangay ádaba slera á Yaisu \*Almasiihu, taslawá á kure: ðabauðaba unṅule á jirire áte una a ðahakuraa Dadaamiya ge ñane na.

<sup>2</sup> Ma vaatara keni gauga ire á kure á katafke á emnde umele, gawevge emnde a kemaare, gawevge emnde a farvaunðe, ma uwe keni naba bashaubasha am dagave á kure, kwá ámbera á wayaavewaye ba kelaazare.

<sup>3</sup> Wavauwáva an ervaunðe á kure palle, geni a tegevka ye á kure na a jakurmaare Shedekwe Cudedðe, a vakurtaa antara hairire na. Ma vaatara keni njawinja á ba áte una ñanna.

<sup>4</sup> Aiklasiya wá, ñane gevge ba seke vuwa á Yaisu Almasiihu, daaci baaka vuwa umele sey ba palle ñanna. Shedekwe Cudedðe keni sey ba palle, tama á miya áte duksa na a ðahamiyaa Dadaamiya ge ñane na keni ba palle.

<sup>5</sup> Yaakadada palle, fetarfire palle, baptisma keni baaka umele sey ba palle,

<sup>6</sup> Dadaamiya palle, ba ɲane una Dada arge emnde bademme, á kwaraná ɲane duksa bademme, aɲkwa am tate-aha bademme, am dagave á emnde bademme.

<sup>7</sup> Yaisu \*Almasiihu a naba magamiyaa ɲurna bademmire á miya, a tegaamiyaa hakuma á mága slera-aha gergere, ma ge ware á miya keni bademme.

<sup>8</sup> Aɲkwa an puwa am wakita á Dadaamiya, a ba ɲane:

Am sarte na ɲane gaaga ndzedá arge kelaade-aha-aara na wá, a naba sluwatervaahe, daaci a naba kapte an itare á detire. Á sáwá áhuwa maa, a dzerese emnde a slera-aara, a tegateraa hákuma á mága slera-aha gergere.

<sup>9</sup> Elva na a ba ɲane: a kapte á detire na mu, á kátá bá uwe ɲane? Elva ɲanna wá, á kátá bá: ndza a tsekwese á sem duniya áhuna emtsaade.

<sup>10</sup> Daaci edda una ndza a tsekwese á sem duniya na wá, ba Yaisu Almasiihu. Ba ɲane ɲanna zlaɓe ádaliye una a kapte á detire ge samaya geni á jemá duksa bademme, ma una am tate-ara keni, á kwaraná ba ɲane palle.

<sup>11</sup> Daaci a tegateraa slera-aha ge emnde-aara, ma ware keni á ba an slera-aara. Emnde umele a gaterve emnde a ɓela, ge emnde umele a vaterte slera á nabiyire, ge emnde umele a vaterte slera á ɓala waazu ma am tate-ara keni bademme, ge emnde umele a vaterte slera á malumire, ge

emnde umele zlaŕe á daliye a vaterte hákuma á kwaraterse wakita á Dadaamiya ge emnde.

<sup>12</sup> A ɓazlaa emnde ɓanna baɗemme geni tá fatermá itare ndzedá am vuwa ge emnde a fetarfe am slera-aatare, geni aiklaisiya na gevge ba seke vuwa á Yaisu \*Almasiihu na, á far wálá ba kelaazare.

<sup>13</sup> Daaci miya baɗemmire á miya mí de gev ba palle, fetarfire á miya palle, diya á miya áte \*Egdza á Dadaamiya na ba palle. Daaci mí de gevge emnde na gyamiyebgye am fetarfire, mí de gev ba kalkale antara Yaisu Almasiihu an ire-aara.

<sup>14</sup> Má gamiyevge estuwa, eɓkale á miya á de gevka seke náza á egdzara mesheshe mazla-aara. Daaci tá de dzegwánka zlermamizlerma emnde a fida an yaimyaimire-aatare, tá de dzegwánka jamiyaa áte uɓɓule á jirire an tsaha fida.

<sup>15</sup> Miya wá, magaumimága ba jirire am dagave á miya, wayaumiyaavewáye an ervaunɗe á miya palle, lauktu mí de far an wálá am duksa baɗemme, mí de gevge kalkale-aara ge Yaisu Almasiihu na ɓane ire á aiklaisiya na.

<sup>16</sup> Ba ɓane una a jatermaare ge emnde-aara a gaterve palle, áte ye palle, ba seke una vuwa á urimagwe: ubiya-aha antara duksa-aha umele tá an dzagwa átirpalle na. Daaci, má vuwa ɓanna ba lapilayye, duksa-aha na tá am ɓane tá maga ba slera wá, vuwa baɗemme á wálá ba shagera. Ba duksa palle ge emnde a fetarfe keni: má tá aɓkwa wayaavewáye ba shagera wá, á wálá aiklaisiya.

*Shifa áŋwaslire na mi shanaa áza Yaisu \*Almasiihu*

<sup>17</sup> Adaba una ŋanna, náwa názu yá ndahakurá ya an zhera á Yaakadada: táslawa á kure, dawalika mágá názena tá maganá emnde na baaka nadina-aatare na. Adaba itare tá dzama ba názena ni baaka nampire-aara d'ekid'eki na.

<sup>18</sup> Tá taa cenevaaka jirire d'ekid'eki, tá shanka shifa aŋwaslire na a vatertaa Dadaamiya ge emnde na, adaba degdegire á ire na tá maganá itare, baaka duksa na ta disaa itare áte unŋule á Dadaamiya.

<sup>19</sup> Itare baaka zherwe-aatare d'ekid'eki. Názena tá kataná itare an ervaun'de-aatare bademme wá, sey ba dakarire, antara duksa zherwe bademme.

<sup>20</sup> Amá ekkure wá, kwa tsahese une-ka áza Yaisu \*Almasiihu.

<sup>21</sup> Ekkure emnde na gakurevge palle antara ŋane na wá, ba jirire cenakurancena elva-aara. Ekkure wá, kwararakursekware jirire na a saminaa ŋane na.

<sup>22</sup> Daaci ekkure wá, eptsawaneptse iga ba d'ekid'eki ge duksa-aha ŋanna shagereka ndza kwa maganaa kure werre na. Adaba am njá á kure werre ŋanna, ndza a jakuraa enkale ba duksa-aha mandzawe na a katanaa ervaun'de á kure na, a kecfakuraa ba ŋane.

<sup>23</sup> Amá yawánya a mbed'akursembeda Dadaamiya ervaun'de á kure bademme, á gakurvege áŋwaslire, kwá gevge ba seke ndza kure-ka.

<sup>24</sup> Daaci gawuvge áŋwaslire am ervaun'de á kure bademme áte una a mbed'akursaa

Dadaamiya, geni kure keni kwá gevge ba seke ñane ám njá á kure bademme. Ba jirire, jeba á nja ñanna wá, cudfedde, wayaawáya Dadaamiya.

<sup>25</sup> Adaba una ñanna, yawánya fida mazlaaara. Ma ware á miya keni a enndaha ba jirire áza ukfenara, adaba gamiyevge palle, mi ubiyaha á vuwa á ura palle.

<sup>26</sup> Ma jákurja ervaunde ba jipu keni, magauka haypa am hude-aara. Zlafe adaliye: a belyakuraareka vaciya kwásau zlafe kwá maga ba ervaunde ñanna.

<sup>27</sup> Yawanánka baráma ge Shaitaine dekideki.

<sup>28</sup> Ma edda una neyle keni, a yánya mazlaaara. Arge una ñanna ambane ñane keni a emmága slera á jirire, geni ñane keni á vaterte duksa ge emnde na tá ankwá zatervaare emnde.

<sup>29</sup> Valyauka elva yaiyaihe am mbuwe á kure, ndahaundaha ba elva á námpire, elva na emnde tá de shá ndzedá an ñane, tá wálá an ñane áte unjule á Dadaamiya na.

<sup>30</sup> Becawanteka Shedekwe Cudfedde na ankwá am ervaunde á kure na. Shedekwe Cudfedde ñanna, ñane gevge ba seke damshe á Dadaamiya áte kure geni kwa emnde-aarire. Daaci vacite umele watse á lyamiselye náza dem ba ge dekideki.

<sup>31</sup> Daaci duksa mándzawe, sawansese am ervaunde á kure bademme: ma dugune, ma ica ervaunde, ma zláza ura, ma dágala, ma danjwire, sawansese jeba á duksa-aha ñanna bademme am ervaunde á kure.



<sup>32</sup> Kure wá, magaumága ba shagerire á er-vaunċe am dágave á kure, magaumága ka-maarire, yawanáreye haypa ge ura am dágave á kure, ba seke una Dadaamiya a yakuraare haypa ge kure áċaba Yaisu \*Almasiihu na.

## 5

### *Zlálá ám parakkire*

<sup>1</sup> Ekkure wá, kwa egdzara á Dadaamiya, a wayákuraa ñane. Aċaba una ñanna, ċabaudaba ba sera-aara am názena kwá maganá kure baċemme.

<sup>2</sup> Am duksa na kwá de maganá kure baċemme wá, yawánka wáyávire, ba seke una a wayámitaa Yaisu \*Almasiihu ge miya, a naba yaa shifa-aara sadake ge Dadaamiya aċaba miya na wá, a magaa duksa na a katanaa Dadaamiya.

<sup>3</sup> Kure wá, kwa emnde á Dadaamiya. Aċaba una ñanna, duksa ba seke gwardzire, fa ice am duksa á ura, antara jeba á duksa-aha ñanna shagerka ċekidėki na, ba ettsála-aara keni zlayeka ċekidėki am dagave á kure.

<sup>4</sup> Zlaċe áċaliye elva-aha na á maga zherwe, antara elva-aha na ċaaka sera-aara ċekidėki na, ira elva-aha na á de waterwá am er-vaunċe ge emnde na baċemme, una-aha ñanna zlayeka am dagave á kure. Arge una-aha ñanna wá, slafawanánslafe ba we á kure ge Dadaamiya áċaba duksa na a magakurnaa ñane na.

<sup>5</sup> Diyaweddiye una ba shagera: emnde a maga gwardzire, bi jeba á duksa-aha ñanna shagerka ċekidėki na, antara fa ice am duksa á ura, baira una ñanna ba kalkale antara mága hele,

emnde a mága duksa-aha ṅanna wá, ba palle-aatare keni á shanka dem zlanna á tara Yaisu \*Almasiihu an Dadaamiya.

<sup>6</sup> A keḏarakuraaka emnde ba dey an elva-aha na baaka nampire-aara ḏekideki na. Áḏaba ba una-aha ṅanna, an zláḏá ervaunḏe á Dadaamiya jipu áte emnde a maganaa garḏire baḏemme.

<sup>7</sup> Daaci a jakurmeka duksa antara jeba á emnde ṅanna ḏekideki.

<sup>8</sup> Werre wá, ndza kwá am tabeḏammire. Amá kina wá, kwá am parakkire aḏaba gakurevge palle antara Yaakadada. Daaci kure keni mag-aumága ba duksa na ni tá maganá emnde na tá am parakkire na.

<sup>9</sup> Aḏaba parakkire wá, ṅane á sá ba shagerire antara magwire, ira jirire.

<sup>10</sup> Wavauwáva an ervaunḏe á kure palle ge diya názena á kataná Yaakadada.

<sup>11</sup> Gawaterápteka ge emnde a mága názu watse baaka nampire-aara ḏekideki, una ba slera á tabeḏammire na. Amá marawa-teránmara shagerkire na tá aṅkwa maganá itare na ba parakke.

<sup>12</sup> Duksa na tá maganá jeba á emnde ṅanna an nasherire wá, ba enndaha-aara keni zherwe ge miya.

<sup>13</sup> Amá má mí ndaaternda duksa-aha á zherwe ṅanna ba parakke wá, emnde baḏemme tá de diyeddiye nja-aatare ba shagera.

<sup>14</sup> Aḏaba duksa na má sesse am parakkire, duksa ṅanna keni gevge parakkire. Aḏaba una ṅanna, ta bantsaa: Ekka na ká am hare na, tsetse am hare, tsetse am emtsa, Yaisu \*Almasiihu á

maraká parakkire.

<sup>15</sup> Adaba una ñanna, magaumága enkale ba shagera am njá á kure bademme, geni de gawevka emnde a cekwire á enkale, amá gawevge emnde a enkale.

<sup>16</sup> Zamane á miya na degiya badzávbadze. Kefawanaaka sarte ba dey, magaumága shagerire.

<sup>17</sup> Adaba una ñanna, gawevka emnde a cekwire á enkale, cenaucena názena ni á kataná Yaakadada ázekure na.

<sup>18</sup> Zlafe ádaliye: a dakurseka mbazla am enkale dekideki, adaba á kefákurá ba una ñanna. Kure wá, nawantenaha ervaunde á kure an Shedekwe Cufedde.

<sup>19</sup> Ma ware á kure keni galaugálá Yaakadada am dagave á kure. Galaugálá an jabura, galaugálá an lahe-aha na á vakurtá Shedekwe Cufedde na, antara lahe-aha umele bademme. Galaugálá Yaakadada an ervaunde á kure palle.

<sup>20</sup> Slafawanánsrafe we á kure ge Eddemiya Dadaamiya ba kelaazare adaba duksa-aha na a maganaa ñane na bademme, slafawanánsrafe we an zhera á Yaakadada á miya Yaisu \*Almasiihu.

### *Nwasha antara zála-aha-aatare*

<sup>21</sup> Ma ware á kure keni, faufa zherwe am dagave á kure, adaba kwa emnde na kwá an lyawa á Yaakadada.

<sup>22</sup> Yá elvan ge kure ñwasha: Faufa zherwe áte zala-aha á kure áte una á kataná Yaakadada Yaisu \*Almasiihu na.

<sup>23</sup> Adaba ba zhele una á kwara mukse, ba seke una á kwaraná Yaisu Almasiihu aiklaisiya, aiklaisiya gevge ba seke vuwa-aara na. Nane wá, ire antara slelya.

<sup>24</sup> Adaba una nanna, sey nwashá tá fa zherwe áte zála-aha-aatare am duksa bademme, ba seke una ankwá fáná aiklaisiya zherwe áte Yaisu Almasiihu am duksa bademme na.

<sup>25</sup> Ekkure keni zála: wayauwáyá nwashá-aha á kure ba seke una a wayanaa Yaisu Almasiihu aiklaisiya-aara, a naba yaa shifa-aara adaba nane,

<sup>26</sup> a baranve tsefanje an yawe, antara elva-aara, geni á ganvege cufedde.

<sup>27</sup> A magaa una nanna bademme na wá, adaba á kátá zhara aiklaisiya-aara ba tsefanje á katafke-aara, zariya jipu, cufedde, á gevge an daradza baaka duksa mandzawe áte nane.

<sup>28</sup> Ba duksa palle ge zála keni: Wayauwáyá nwashá-aha á kure ba seke shifa á kure. Ma ware una zhele, wayetewáyá mukse-aara, a wayete ba shifa-aara.

<sup>29</sup> Baaka ura á magantá kelaadire ge ire-aara, amá á zanu duksa, á fanu hyema ba seke una ankwá á fanuwa Yaisu \*Almasiihu hyema ge aiklaisiya na.

<sup>30</sup> Adaba bademmire á miya na wá, mi ba seke ubiya-aha antara duksa-aha umele na am vuwa-aara na.

<sup>31</sup> A ba wakita á Dadaamiya wá: A sesse zhele am mba á eddenjara, a njarinja antara mukse-aara. Itare ta buwa nanna tá de gev ba vuwa palle.

<sup>32</sup> Elva na am wakita á Dadaamiya ṅanna wá, a sanse elva yaikke. Ate iya wá, aṅkwa á pálá elva a Yaisu Almasiihu antara aiklaisiya-aara.

<sup>33</sup> Amá wá, antara ba názá á kure keni, geni ma ware á kure keni a ewwáyá mukse-aara ba seke shifa-aara, mukse keni a effa zherwe áte zhele-aara.

## 6

*Náwa tá nja estuwa egdzara antara emnde a há-aatare*

<sup>1</sup> Ekkure egdzara, cenaucena elva á dada-aha á kure an mama-aha á kure, adaba una ṅanna duksa na á kataná Yaakadada ázekure, zlayákurzláyá ge kure na kwa emnde-aara.

<sup>2</sup> A ba palle á shairiya-aha á Dadaamiya wá: «Effa zherwe áte tara eddeṅa an emeṅa.» Zunṅwe ba una ṅanna am shairiya-aha á Dadaamiya na a ba Dadaamiya, á de vaterte duksa ge emnde na má dabartedaba an jirire na.

<sup>3</sup> Duksa ṅanna wá: Ká de gedetegeḍa, ká de shekwaashekwa am duniya, á bina.

<sup>4</sup> Ekkure dada-aha á egdzara keni, zladawaterveka ervaunḍe ge egdzara á kure, amá kwarawatersekwáre duksa, kwá ámbera giyatergiya áte una á de kwarakursá Yaakadada Yaisu \*Almasiihu.

*Náwa tá nja estuwa náve-aha antara dada-aha-aatare*

<sup>5</sup> Ekkure náve-aha, fawatersarefe ge dada-aha á kure am duniya. Faufa zherwe áte itare, gawanaaga ire á kure á katafke-aatare, magaumága slera á kure an ervaunḍe á kure

palle, ba seke una kwá an̄kwa fansaare ge Yaisu \*Almasiihu na.

<sup>6</sup> Magauka slera adaba ice-aatare geni a galarakurgálá, amá zharauzhárá ire á kure ba seke kwá náve-aha á Yaisu Almasiihu. Magaumága názena á kataná Dadaamiya an higa á kure campaukkwe am ervaun̄de.

<sup>7</sup> Magaumága slera á kure an ervaun̄de palle, ba seke kwá magaterán ge emnde-ka slera n̄anna, amá kwá maganán ge Yaakadada.

<sup>8</sup> Diyaweddiye una ba shagera: ma ware una á maga ba shagerire na, edda-aara ma náve, ma á kwaraná n̄ane ire-aara keni, watse á de pelansepele Yaakadada Yaisu Almasiihu.

<sup>9</sup> Ekkure dada-aha á náve-aha keni: Magaumága shagerire á ervaun̄de áte náve-aha á kure, gawaterteka lyáwa, diyaweddiye geni kure antara náve-aara á kure badem̄me Edda á kure ba palle, an̄kwa am samaya. N̄ane wá, badem̄me á emnde ta ba kalkale ázen̄ára.

### *Kazlaṅa á wáwa á emnde a fetarfe*

<sup>10</sup> Náwa jugená á elva na yá bakurná ya ge kure. Ekkure wá, tatayautátaya ndzedá á kure á ba áza Yaakadada, yawánya a ndzedakurtendzedá ba n̄ane an hakuma-aara na jauje ge duksa badem̄me na.

<sup>11</sup> N̄gwadawápsengwadá ba shagera an kazlaṅa na a vakurtaa Dadaamiya na badem̄me, tsawaatse ba shagera an n̄ane, geni ma watse á sawa am laukte-ara Shaitaine ge badakurbáda keni, kwá gáná ba kure ndzedá.

<sup>12</sup> Wáva á miya ñanna wá, degi mí wava an emndimagwaha-ka, mí wava an male-aha á jini-aha, antara jini-aha-aatare na tá an hákuma am zhegela antara am duniya bademme na.

<sup>13</sup> Adaba una ñanna, ñgwadawápsengwáda ba shagera an kazlaña na a vakurtaa Dadaamiya na bademme, lauktu kwá de tsaatse degdege am sarte á emtañkire, kwá de dzegwándzegwa, kwá de gevá midala-aha dete halavuwa-aara bademme.

<sup>14</sup> Daaci, njawinja am niya á kure ba kelaazare; tsawaatse á ba áte jirire. Adaba jirire wá, gevge ba seke náza ñguða huđe á kure ge kure. Zlađe ádaliye, magaumága dzayyire á erwaunde. Má kwá añkwa maga dzayyire á erwaunde wá, una ñanna ba seke kwá tsekweme am kebebbe.

<sup>15</sup> Balaubálá labara á higa, elva a Yaisu \*Almasiihu na á de vatertá ñane hairire ge emnde. Yawánka dfekideki. Una ñanna keni maa, gevge duksa na kure kwá tse átekwa, ba seke kimake na am sera á kure ge dába unñule á Dadaamiya.

<sup>16</sup> Ma vaatara keni, gulawanaaka fetarfire á kure. Una ñanna ba seke tsakuraatse am gulakwa ge lyiya gurme-aha na á devaná Shaitaine á se wakurwa an ñane na.

<sup>17</sup> Eksawanteksa am erwaunde á kure geni á lyákurlye Dadaamiya. Una ñanna ba seke tuñkur ge tsufakura ire á kure. Zlađe ádaliye, ñawanaaña elva á Dadaamiya an erwaunde á kure palle. Una ñanna keni ba seke masalám á kure a vakurtaa Shedekwe Cufedde.

<sup>18</sup> Nalaunála Dadaamiya ba kelaazare am laukte-aha bademme. Nalaunála an erwaunde á

kure palle áte una á de marakurná Shedefkwe-aara. Ma vaatara keni melawaterumele ge emnde a fetarfe umele an maduwa-aha á kure, yawanka una ðekideki.

<sup>19</sup> Magaumága maduwa arge iya keni, geni yá ndáhá elva á Dadaamiya ba parakke, yá palaternaapálá labare á higa na a tsekwanaa Dadaamiya na ge emnde.

<sup>20</sup> Adaba una ñanna, una ma yá am dangay keni, ya ba slebela á Yaisu Almasiihu. Daaci melawiyumele an maduwa geni a gazlanka ðekideki, amá yá enndaha bademme áte una á kataná Dadaamiya.

*Ga use am halavuwa á elva-aha*

<sup>21</sup> Egdza emmemiya Tikikus na mí wayaná an ervaunðe á miya palle, ñane keni ba sleslera á Yaakadada Yaisu \*Almasiihu an ervaunðe-aara palle na wá, á de palakurnaapálá ba ñane labare-aaruwa, antara duksa na yá anjwa maganá ya bademme.

<sup>22</sup> Yá belán ba ge una á dezekure, geni kure keni kwá diyeddiye zláláva á ñere áhuna, antara geni á de ekhyakurnaakhya ervaunðe.

<sup>23</sup> Tara Eddemiya Dadaamiya, tá antara Yaakadada Yaisu Almasiihu, a varakurteva hairire, a faremfa háyávire am dagave á kure, a magarakuránmaga ñgurna geni kwá farfe ge fetar áte Yaisu Almasiihu á ba an jirire.

<sup>24</sup> A magateránmaga Dadaamiya ñgurna ge emnde na wayarwáya an Yaisu Almasiihu ge shifa-aatare am duniya bademme na.



**Wakita á Dadaamiya**  
**La Bible en wandala**

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 25 Aug 2024 from source  
files dated 29 Jan 2022

dec75dd5-4784-5059-aa00-668d508a6b0d